

VENDIM
Nr. 175, datë 14.11.2019

**MBI KËRKESËN E OSHEE SHA PËR SHTYRJEN E AFATEVE TË PËRCAKTUARA NË
RREGULLOREN PËR KRITERET STANDARDE TË CILËSISË SË SHËRBIMIT TË
SHPËRNDARJES SË ENERGJISË ELEKTRIKE**

Në mbështetje të nenit 7, pika 1, dhe nenit 16, të ligjit nr. 43/2015, “Për sektorin e energjisë elektrike”, të ndryshuar; nenit 104, pika 4, germa “a”; nenit 113, pika 1 dhe 3, e ligjit nr. 44/2015 “Kodi i Procedurës Administrative”, si dhe nenit 15, të “Rregullores së organizimit, funksionimit dhe procedurave të ERE-s”, bordi i ERE-s, në mbledhjen e tij të datës 14.11.2019, mbasi shqyrtoi relacionin e përgatitur nga Drejtoritë e ERE-s nr. 102/3, datë 7.11.2019, për kërkesën e OSHEE sh.a. për shtyrjen e afateve të përcaktuara në rregulloren për kriteret standarde të cilësisë së shërbimit të shpërndarjes së energjisë elektrike, dëgjoi sqarimet e përfaqësuesve të OSHEE sh.a. pjesëmarrës në këtë mbledhje, dhe

konstatoi se:

- Me vendimin nr. 181, datë 10.11.2017, bordi i ERE-s vendosi: miratimin e rregullores për “Kriteret standarde të cilësisë së shërbimit të shpërndarjes së energjisë elektrike”.

- Në vijim të kësaj vendimmarrje, me kërkesë të shoqërisë OSHEE sh.a, si rezultat i pamundësisë për të përmbushur kërkesat e kësaj rregulloreje brenda afateve që ajo përcakton, në lidhje me realizimin e investimeve të domosdoshme, bordi i ERE-s, me vendimin nr. 271, datë 21.12.2018, vendosi shtyrjen e afateve të përcaktuara në rregulloren për “Kriteret standarde të cilësisë së shërbimit të shpërndarjes së energjisë elektrike”.

- Në përfundim të afateve të përcaktuara në vendimin sipërcituar, pas kërkesës së përsëritur të OSHEE-së, ERE-ja, me vendimin nr. 104, datë 26.6.2019, u shpreh për një ndryshim në vendimin e bordit të ERE-s nr. 181, datë 10.11.2017, “Për miratimin e rregullores për kriteret standarde të cilësisë së shërbimit të shpërndarjes së energjisë elektrike”, të ndryshuar, duke vendosur ndryshimin e pikës 2, të vendimit nr. 104, datë 26.6.2019, si në vijim:

- Pika 7.3, e “Rregullores për kriteret standarde të cilësisë së shërbimit të furnizimit dhe performancës së sigurisë së rrjetit të shpërndarjes së energjisë elektrike”, ndryshon dhe bëhet: “OSHEE sh.a do të propozojë në ERE për miratim, nivelin e lejuar të kriterëve standarde të cilësisë së shërbimit, brenda datës 30 Shtator 2019.”.

- Në datën 2.10.2019, është paraqitur në ERE kërkesa e OSHEE-së nr. 400/7 prot., për shtyrjen e afateve të përcaktuara në rregulloren për kriteret standarde të cilësisë së shërbimit të shpërndarjes së energjisë elektrike pas vitit 2021.

- OSHEE-ja kërkon që, në pamundësi të plotësimit të treguesve të cilësisë së furnizimit nga ana e OSHEE-së për arsytet e përmendura në studimin e detajuar (bashkëlidhur shkresës), të shtyhet afati i aplikimit të nivelit të lejuar të kriterëve të standardeve të cilësisë së shërbimit, referuar vendimit nr. 182, datë 10.11.2017, të bordit të ERE-s, duke filluar pas vitit 2021.

- Kërkesa e OSHEE-së jep shpjegime në lidhje me rrethanat që e pamundësojnë përmbushjen e detyrimit të përcaktuar në vendimin e bordit të ERE-s nr. 104, datë 26.6.2019.

Bashkëlidhur kësaj kërke, OSHEE-ja ka përcjellë:

- Tabelën për “Kriteret standarde të cilësisë së shërbimit të shpërndarjes së energjisë elektrike” të plotësuar nga ana e OSHEE-së.

- Studimin e detajuar të treguesve të performancës së rrjetit të shpërndarjes.

- OSHEE-ja ka insistuar në pamundësinë e realizimit të plotë të investimeve të parashikuara në vështirësitë financiare që kjo kompani ka ecur, për shkak edhe të situatës hidrologjike në vend.

- Përfaqësuesit e OSHEE sh.a., në mbledhjen e bordit, dhanë shpjegime të zgjeruara në lidhje me masat e marra, por dhe rezultatet e ardhura si rrjedhojë e këtyre masave, sa i përket rritjes së cilësisë së shërbimit,

uljes së numrit të ndërprerjeve, uljen e kohës mesatare të ndërprerjeve për klient në masën 50% krahasuar me pesëvjeçarin e kaluar

- Përfaqësuesit e OSHEE sh.a. u shprehën të gatshëm për të bërë çdo përpjekje të nevojshme me qëllim arritjen e targetave të vendosur në “Rregulloren për kriteret standarde të cilësisë së shërbimit të shpërndarjes së energjisë elektrike”, dhe legjislacionit në fuqi.

- OSHEE sh.a. të marrë masa për të paraqitur në ERE studimin e detajuar mbi përshkallëzimin e realizimit të parametrave të kërkuara sipas zonave të sipërcituara dhe të propozojë nivelet e lejuara të cilësisë së shërbimit, siç është përcaktuar në rregullore.

Për gjithë sa më sipër cituar, bordi i ERE-s,

VENDOSI:

1. Ndryshimin e pikës 2, të vendimit të bordit të ERE-s nr. 104, datë 26.6.2019, si më poshtë:

a) Pika 7.3, e “Rregullores për kriteret standarde të cilësisë së shërbimit të furnizimit dhe performancës së sigurisë së rrjetit të shpërndarjes së energjisë elektrike”, ndryshon dhe bëhet: “OSHEE sh.a do të propozojë në ERE për miratim nivelin e lejuar të kriterëve standarde të cilësisë së shërbimit, brenda datës 1.1.2021.”.

2. Drejtoria e Çështjeve Ligjore, të njoftojë aplikuesin për vendimin e bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti